



Här Fernand Etgen
President vun der Chamber

Lëtzebuerg, de 24. Februar 2023

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Minister fir Educatioun, Kanner a Jugend weiderzeleeden.

Digitalisatioun ass Deel vun der Educatioun. Et ass deemno net vun ongeféier, dass an de Lycéeën ëmmer méi Formatiounen ugebuede ginn, bei deenen d'Schüler mat informatischem Material schaffen, mat Tablet (iPad) oder Laptop, sou zum Beispill beim Projet One-2-One vum Ministère.

Bei bestëmmte Formatiounen ass bewosst de Choix geholl ginn, fir mat Laptops ze schaffen, well fir de Cours eng Windows-Plattform gebraucht gëtt. Mengen Informatiounen no kruten an de leschte Wochen awer bestëmmte Formatiounen – dorënner och de Beräich vun der Landwirtschaft – Bescheed gesot, dass déi entspriechend Schüler vu kommendem Joer un net méi a Fro géife kommen, fir mat Laptops equipéiert ze gin. Fir déi landwirtschaftlech Formatioune bedeit dat, dass d'Inhalter aus de Programmer net méi kënne vollstänneg ëmgesat ginn, a virun allem dass d'Ausbildung net méi un d'Entwécklung an d'Ufuerderunge vun der Praxis ugepasst ass.

An deem Kontext wéilt ech folgend Froen un den Här Minister fir Educatioun, Kanner a Jugend riichten:

- Kann den Här Minister confirméieren, dass bestëmmte Formatiounen an Zukunft net méi fir den Equipement mat Laptops a Fro kommen?
 - Wa jo, wat ass de Grond fir déi Decisioun?
- Ass den Här Minister net der Meenung, dass och am Beräich vun der Landwirtschaft mat sougenannte „Smart Technologies“ geschafft gëtt an dass grad dës Schüler via adequat informatesch Material heizou Zougang missten hunn?
- A wéi wäit ass am Virfeld vun der entspriechender Decisioun zu Gonschte vun Tablets iwwerpréift ginn, ob doduerch fir déi betrafte Formatiounen respektiv Schüler eventuell Nodeeler bei der Wëssensverméttlung entstinn?

Här President, ech bieden Iech, mäin déifste Respekt unzehuelen.

Martine Hansen
Co-Fraktiounspresidentin



Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 7664 vun der honorabeler Deputéiert Martine Hansen

Ad 1)

Den Educatiounsministère huet am Joer 2018 den nationale Programm *one2one* agefouert. Dëse Programm ass initial an d'Liewe geruff ginn, fir kënnen alle Schülerinnen a Schüler a Klassen aus dem Enseignement secondaire an aus der Formation professionnelle een Tablet zur Verfügung ze stellen, an dëst fir den Unterrecht zäitgerecht gestalten ze kënnen, also eng Méiglechkeet ze schafen, fir ënnerschiddlech digital didaktesch Methoden anzesetzen.

Laptoppe si méi spéit an de *one2one* Programm opgeholl ginn, dëst am Kader vu verschiddene Formatiounen, wéi zum Beispill de Smart Technologies-Formatiounen¹ an och den Informatik-Formatiounen. Eng essentiell Iwwerleeung war an deem Kontext, datt de Schüler sollt autonom déi komplett Administratioun vun sengem Laptop assuréieren, net zulescht, well dëst Bestanddeel vu senger Formatioun sollt sinn.

Schoulen, déi di concernéiert Formatioun offréieren, kréie weiderhin iwwert de *one2one* Programm Laptoppe fir hir Klassen zur Verfügung gestallt.

Ad 2)

All d'Klassen aus dem Enseignement secondaire an der Formation professionnelle kënnen mat Tabletten equipéiert ginn. Dës si quasi fir all Besoinen, déi an de Formatiounen opdauchen, adaptéiert.

A spezifesche Formatiounen kënnen d'Schülerinnen a Schüler och Laptoppe kréien. Doriwwer eraus huet all Lycée d'Méiglechkeet, sech niewent dem *one2one*-Programm Chariote mat Laptoppen am Kader vun der järelecher Acquisitionsprozedur unzufroen. Dës Laptoppe kënnen dann an eenzelne Klassen an den Asaz kommen, falls et Momenter ginn, wou d'Tabletten net genuch Méiglechkeete bidden.

Esou verfüügt jiddereen an de Lëtzebuerger Lycéeën iwwert dat adequat informatesch Material, fir seng Formatioun an de beschtméigleche Konditiounen duerchlafen ze kënnen.

Ad 3)

Doduerch, datt all Schülerin a Schüler aus dem Enseignement secondaire an der Formation professionnelle mat engem Tablet equipéiert ka ginn an doriwwer eraus d'Lycéeën kënnen Laptoppen ufroen, gesäit den Educatiounsministère net, wou do eventuell Nodeeler bei der Wëssensverméttlung entstoe kéinten.

Lëtzebuerg, den 18. Abrëll 2023

De Minister fir Educatioun,
Kanner a Jugend

(s.) Claude MEISCH

¹ <https://men.public.lu/de/grands-dossiers/formation-professionnelle/smart-technologies.html>